



A lokisetse Morena Sechaba se phethehileng (Luka 1,17)

Tel: 28 350 466/ 62600983 (WhatsApp)

MOELETSI OA BASOTHO


PARARE DOMINO PLEBEM PERFECTAM

**LHDA e thakhola mokete**

7

Li mometse ho bacha

9

www.moeletsioabasotho.co.ls

Re se re fumaneha ho marangrang

Email: newsroom@moeletsioabasotho.co.ls
Tel: +266 28350466/ Whats app: 62600983

MOELETSI

Boitokisetso ba Mokete oa Paseka

Nako ea Karisima ke tlhekolo ea ho tla ketekela Kriste ea tsohileng bafung, 'me ke hona nakong ena moo re le bakriste re lokelang ho inahana ka tsa leholimo.

Nakong ena ea Karisima, Kereke e re hopotsa bohle ho soabela libe tsa rona le ho li lefella ka boitimo ba rona, lithapelo le ho etsa liketso tsa mohau.

Ke nakong ena eo re lokelang ho itlhaloba liketso tsa rona tsa bokhopo, bolotsa, bonyollo, bosholu, lipolao le lintho tsohle tse khahlanong le melao ea Molimo, 'me re be le pako ea 'nete.

Re na le bana ba bo rona ba phelang lichankaneng, ba kulang le likhutsana tse se nang ea li hlokomehang ka lijo le liaparo. Mofuta oona oa batho ke oona o ka hlabolloang ka mesebetsi ea mohau, ba eteloa, ba fuoa seo ba ka phelang ka sona. Mangolo a Halalelang a hlalosa kamehla hore ho lehlohonolo letsoho le fanang ho feta le amohelang.

Bongata ba likopano ke nakong ena li tsoang ka makhalo ho ea hloela bakuli ba bona le ho ba rapella mahlokong ao b'a utloang, ho ba khothatsa hore ba phahame liphateng tse chesang. Ketelo eo ka bo eona e fetoha moriana ho bakuli, e etsa hore ba eleloe hore le bona ke batho ba ntse ba ratoa.

Ho na le batho ba ipokeletsang ka maruo a lefatše lena ho feta ho ruoa tsa 'muso oa Molimo. Leruo ha le na bobbe, taba ke hore na uena ea ruileng u sebelisa leruo la hau joang. Na u le arolelana le mafutsana le bahloki? Kapa ka lebaka la bonyollo u ikhethela ho ja u khora le ba ntlo ea hau?

Ba bang ba barui ba fetohile maoatla hobane ba labalabele ho ruoa nameng ho feta moeeng. Ha ba eleloa hore tsohle tseo ba ipokeletseng ka tsona, hona le mohlaba ba tla shoa 'me ba li siee.

Hona joale sechaba sa Basotho se ferekane ke polotiki ea naha ena, 'me bakriste ba nang le seabo litabeng tsena, ba sitoang ho falimeha hore nako ena ha se ea lintoa le marata a senyang lipelo tsa batho ba bang.

Nako ena ha se ea ho hlaba lipelo tsa batho ka lipuo le liketso tsa bokhopo. Ho ngoetsoe ho thoe; ho malimabe eo khopiso e hlahang ka eena. Ho se ikapese sekhobo sena ho molemo ho batlela pelo ea hao phomolo ho Molimo fela.

Ketsahalo e ferekanyang sechaba ha e lokele ho atameloa ka moea o phahameng, e se re ho e-na le hore e loke, ebe ho senyeha ho feta. Lipolotiki ha li se ke tsa re arohanya, hona joale re hlokometse hore bakhethoa ba tšelela makhotleng le mekheng e meng.

E se eka bonngoe boo ekaba ba moshoelella e le hobane ba lumela hore ho fapana ka maikutlo, ho se shebele litaba hammoho ba hloeane, ba fethetsane ka majoe ho be ho be le tšollo ea mali. Re laba-labela khotso le kutloano feela sechabeng sa Basotho, ha ngoaneno a u sitetsoe u mo tšoarele u se phetsetse bobbe ka bobbe.

Re lebohela maqheku le maqhekoana haele mona ba hopotsoe ka ho ekeletsoa ka M50.00 le bahlanka ka 2%. Likhakanyo tsee na li mometse kapa joang? Li reng ho bacha, ho sechaba, tlhahiso ea mosebetsi teng? Re se re tla boka ha li oroha.

MOLIMO A BOLOKE LESOTHO LE BASOTHO

Lesotho le itlhophela ntlafalo ea Marang-rang

Nthabeleng Seitlheko

Motsamaisi e Moholo oa Vodafone Egypt, Mong Mohamed Abdullah, hammoho le baetapele ba Vodacom Group ba tsoang mebarakeng ea machaba le ba Vodacom Lesotho, ba etetse Letona la Likhokahanyo le Mahlale le Boqapi, Mohlomphehi Nthati Moorosi ka la 16 Hlakola monongoaha.

phetoho ea litšebeliso tsa ona hore li sebetse ka marang-rang a morao-rao. Ho boletsoe hore Vodacom e se e ile ea thusa linaha tse kang Kenya le Egepete ka merero e tšoanang ea ho kenya tšebetsong tsamaiso tsa marang-rang, 'me Lesotho le ka rua molemo ka boiphihlelo boo.

Mofo oa Vodacom o ne o bopiloee ka Ofisiri e Kholo ea Tsamaiso le Litaba tsa Kantle ho Vodacom Group, Mong

opane.

Ka lehlakoreng la lekala ho ne ho ena le Mohlomphehi Nthati Moorosi, a felehelitsoe ke Mongoli e Moholo oa Lekela Kano no Ramashamole, motsamaisi oa mahlale Thapeli Tjabane le 'Makamohelo Mofiliikoane Moeletsi e Moholo oa Molao, har'a ba bang.

Kopano ena e nkoa e le mohato oa bohlokoa ho matlafatsa tšebeliso lipakeng tsa 'Muso le lefapha le ikemetseng, ka



Kopano ena e ne e reretsoe ho buisana ka tšebeliso - 'moholefapheng la mahlale (digital partnership), e ka thusang 'Muso oa Lesotho ho potlakisa

Ayman Essam, Motsamaisi e Moholo oa Vodacom Lesotho, Mohale Ralebitso, le Hlooho ea Tsamaiso le Litaba tsa Kantle Vodacom Lesotho Tšepo Nta-

sepheo sa ho ntlafatsa litšebeliso tsa sechaba, ho eketsa boiphihlelo ba marang-rang le ho aha moruo o ipapisitseng le marang-rang Lesotho.

Bacha ba itela ho 'muso

Nthabeleng Seitlheko

Bacha ba bangata ba ile ba bonahala ka lipolokate kantle ho Paramente, ka la 18 Hlakola monongoaha nakong eo Letona la Lichelete le Ntšetsopele ea Meralo Dr. Retšelisitsoe Matlanyane, a ntseng a fana ka likhakanyo tsa lichelete tsa selemo sa 2026/27 kahar'a Lekhotla la Sechaba.

Boipelaetso bona bo bontša ho tšoenyeha ho hoholo har'a bacha ka lebaka la tlhokahalo ea mesebetsi e ntseng ho phahama. 'Muso o ile oa phatlalatsa boemo bona e le koluoa ea naha ka Phupu 2025, kamor'a hore palo ea bacha ba sa sebetse e atamele ho 50%, ho lahlehela ke mesebetsi mafapheng a bohlokoa le mathata a moruo a tsoang kantle ho naha.

Phatlalatsa ena e ne e reretsoe ho lumella mehato ea tšohanyetso, ho bokella lisebelisoa le ho potlakisa hore 'muso o nke khato tlas'a Molao oa Tsamaiso ea Likoluoa, 'me boemo bona ba koluoa bo tla sebetse ho fihlela la 30 Phupjane 2027.

Bacha ba ipelaetsang ba ne ba kopa hore 'muso oa Lesotho ka likhakanyo tsa ona tsa lichelete tsa selemo sena o tle le mehato e hlakileng, e nang le chelete e behiloeng ka thoko, ho theha mesebetsi e meholo, ho matlafatsa koetliso ea litsebo, ho tšehetsa likhoebo tsa bacha, haholo-holo temo le bo-rakhoebo, hammoho le ho tlosa litšitiso tsa tsamaiso tse sieang bacha ba bangata ba Basotho ba se na menyela.

Ho sa le joalo koranta e batlile maikutlo a baetapele ba bacha ba lipolotiki ba fapanang mabapi le khakanyo ea lichelete e baliloeng, ke moo e mong Moliehi Nkhabu e le

moetapele oa bacha ba BNP a hlalositse hore bona e ne e se karolo ea bacha ba nang ba ile paramenteng, o hlalositse hore khakanyo ea lichelete ha e re letho ka bacha.

A re selemong se fetileng bacha ba tšepisitsoe M400Milion, hoa ba le chelete e joalo ho fihlela ka Tlhakubele ha chelete tsohle li khutla tse makaleng. Bacha ntse ba sena mesebetsi, e ntse e le bothata, le libanka ntse li sa fane ka chelete ho thusa bacha ka thoko ho lipehelo tsa hore ba behe thepa e itseng paneng.

E mong Tšepo Masupa ho hlaha ho Bacha Shutdown o re ba tla lula ba emela bacha hobane 'muso o iphapanetsa tlala le tlakotsi eo bacha ba tobaneng le eona.

O re taba tsena tsa tlhokahalo ea mesebetsi ho bacha li ama le bophelo bo botle ba bona, kaha litaba tsa mafu a kelello li ntse li phahama, e bang 'muso o ntse o iphapanetsa boemo bona ehlile re bothateng.

Contacts: +266 28350 466

62600983 WhatsApp

Email: newsroom@moeletsiabasotho.co.ls

Sales and Marketing: (+266) 28 350 466/ 57396597 (WhatsApp)

MOELETSI oa BASOTHO

EMAIL: editor@moeletsiabasotho.co.ls

sub-editor@moeletsiabasotho.co.ls

Mohale Lehlohonolo (Sub-editor)

(+266) 58 771 507 / 62 771 507

Journalists

Nthabeleng Seitlheko

Tšelis Thakholi

Production Desk: 'Mateele Liqa

57 665 038/ 68 216 271

58 540 853/ 63 480 404

Naha e hula ka tlhako tsa morao



Nthabeleng Seitlheko

Bahlanka ba 'Muso ba tla nyolelloa ka 2%, ha maqheku le maqhekoana a ekelelitsoe M50.00 litšianeng tsa bona tsa khoeli le khoeli. Litaba tsena li hlahetse puong ea Letona la Lichelete Dr. Retšelisitsoe Matlanyane, h'a teka likhanyo tsa lichelete ka Ntlong ea Bakhethoa ka la 18 Hlakola monongoaha.

Puong ea hae o hlalositse hore 'muso o ile oa kenya tšebetsong mehato e kang ho fokotsa basebetsi, ho hlophisa bocha nako ea tšebetso ea merafo, le ho fana ka phomolo e khethehileng litefong tsa marena (royalties) e le ho boloka chelete le ho tšehetsa tšebetso ea likampani.

Sekhahla sa ho nyoloha ha litheko se ntse se laoloa hantle, se theohile ho 4.3% ka 2025 'me se lebelletsoe ho tsitsa pakeng tsa 4.5% le 4.7% nakong e mahareng. Sena se tšehetsoa ke ho theoha ha litheko tsa lijo le mafura, leha ho ntse ho e na le liqholotso tse ka hlahang ka lebaka la ho feto-fetoha ha sekhahla sa phapanyetso le mathata a khoebo ea lefatše.

Ntšetsopele ea Moruo oa

Lehae, e lebelletsoe ho hola butle, ka 1.5% ka 2027/28 le 1.6% ka 2028/29. Temo e lebelletsoe ho ntlafala ka lebaka la mekhoe e mecha ea ho ikatisa ha liphoofole le maemo a matle a leholimo. Lefapha la Tlhahiso) le tla rua molemo ka lifeme tse ncha Ha Tikoe le Ha Belo, haholo 'industry' ea masela. Ho boetse ho na le maikemisetso a ho atolosa mebaraka ea tikoloho le ea Europe.

Leha ho le joalo, kholo ena e ke ke ea lekana ho koahela ho putlama ha likampani tse itšetlehileng ka AGOA, hoo ho ama kholo ea likhoebo tsa masela. Merafo le eona e ntse e imetsoe ke ho theoha ha litheko tsa litaelo le tlohisano ea litaelo tsa maiketsetso.

Chelete e kenang le tšebeliso ea eona ea selemo sa lichelete sa 2025/26, e hakanyetsoa ho M27.1Billion (60.2% ea GDP). Lekeno la lekhetho ke M10.7 Billion, le kenyeletsang M5.4 Billion ea lekhetho la meputso le M5.3 Billion ea lekhetho la thepa le litšebeliso. VAT e ntse e le mohloli oa bohlokoa.

Sekoloto sa Naha qetellong ea Pherekhong 2025/26, se ne se le ho M22.7 Billion (50% ea GDP), se theohile ho tloha ho M23.4 Billion ka 2024/25. Karolelano ea sekoloto ho GDP e theohile ho tloha ho 54.3% ho ea ho 50%. Boholo ba sekoloto sa kantle bo ntse bo le ka mae-mo a bonolo (concessional)

ka 88.4%. Leha ho le joalo, Lesotho le se le nkoa e le naha ea meputso e mahareng (low middle income), e leng ho eketsang litšenyehelo tsa ho alima mebarakeng ea machaba.

Ho itšetleha haholo ka chelete ea SACU (e ka bang 20% ea GDP) ho beha moruo kotsing, haholo ha moruo oa Afrika Boroa o sa tsitsa. Litefiso tse ncha tsa kantle le bofokoli ba mebaraka ea litaelo li ka ama khoebo le matsete.

Khoebo le Matsete li abetsoe M437.4 Million e le ho matlafatsa tlohisano le ho atolosa mebaraka. Lichelete li tla tšehetsa phapanyetsano ea mebaraka ho European Union, United Kingdom, African Continental Free Trade Area, SACU le SADC.

Liphetoho tsa moruo oa lefatše le oa tikoloho li bile le tšusumetso e matla e tobileng Lesotho. Le hoja moruo oa linaha tse kholo o ntse o hola.

Leha 'Muso o atlehile ho fumana katoloso ea selemo se le seng ea AGOA le ho theoleloa litefiso ho tloha ho 15%, litefiso tsena li ntse li phahame ha li bapisoa le mehla e fetileng. Ho se tsitse ha khoebo le mebaraka ea lichelete ea lefatše ho totobatsa bohlokoa ba ho boloka mehloli ea tšireletso ea lichelete (fiscal buffers), ho sireletsa botsitso ba lichelete tsa kantle, le ho ela hloko mathata a ka hlahang ka SACU, khoebo le mae-mo a lichelete tikolohong.

Tšusumetso e bile kholo haholo mafapheng a masela, liaparo le merafo ao e leng bahiri ba baholo ba likhoebo tse ikemetseng. Bareki ba machaba ba fetola mehloli ea bona ea thepa, ba qoba linaha tse nyenyane. Sena se bakile ho koaloa ha lifeme le merafo, tahlehelo ea mesebetsi le ho theoha ha meputso ea malapa, ho leng kotsi ho mesebetsi, chelete ea kantle, bokhoni ba basebetsi le botsitso ba sechaba.

Ka nako e tsoanang, lichelete tsa thuso tse bonolo (concessional financing) li fokotsehile haholo. Ho hlakola ha MCC Compact II le mananeo a mang ho bontša ho fokotseha ha lithuso tsa mahala, ho bakileng lekhalo la lichelete mafapheng a bophelo, metsi le temo.

Ntšetsopele ea Moruo oa Lehae 2024/25, moruo o ile oa hola ka 4.2%, o susumetsoa haholo ke morero oa Lesotho Highlands Water Project Phase II, moo kha-ho e ileng ea hola ka 6.3%. Lifeme tsa masela li ile tsa atleha ho fihlela ho 3.2% ho tloha ho 11.1% ka 2023/24, ha likampani li potlakisa ho phetha litaelo ka lebaka la ho se tsitse ha AGOA. Leha ho le joalo, kholo ena e bile ea nakoana.

Ka 2025/26 kholo e theohile ho 1.4% ka lebaka la maemo a khoebo a kantle, ho kenyeletsa litefiso tse phahameng le ho theoha ha litheko tsa litaelo. Ho putlama ho bile matla mafapheng a masela le merafo, moo ho ileng ha e-ba le ho fokotseha ha litaelo, ho lelekoa ha basebetsi le mehato ea ho boloka litšenyehelo.

Boemo bona bo bontša hore leha ho na le boiteko ba ho boloka botsitso ba lichelete, moruo oa Lesotho o ntse o tobane le qholotso tse matla tsa kantle le mathata a kahare a hlohang maano a tiileng le phetoho e potlakileng.

Ho tla ntlafatsoa meeli ea Maseru, Ficksburg le Qacha's Nek. Ho ngolisa likhoebo mahala le ho kenya 'system' ea laesense ea marang-rang. Ho tla boela ho aho lifeme Maseru le Leribe, le tse ncha bakeng sa litlolo, oli ea tlhaho le linoko.

Molaetsa oa bohlokoa ke hore tekanyetso ena e thehiloe tumelong ea hore bokamoso ba Lesotho bo itšetlehele ho fetoleng moruo le ho lokolla bokhoni bo felletseng ba Basotho. Ke tekanyetso ea ketso e retsoeng ho tsitsisa moruo, ho lokisa mekhatlo le ho

bula menyetla ea kholo e kenyeletsang bohle.

Ho sisintsoe hore meputso ea basebeletsi ba sechaba e nyolohe ka 2%, 'me meeli ea lekhetho e fetoloe ho sireletsa ba meputso e tlaase le e mahareng khahlanong le 'inflation'.

Qetellong 'muso oa kopa tšehetso ea Paramente le sechaba ho khetha sebethe ho ena le boiketlo, tsoelopele ho ena le ho ema, le ho aha motheo o tiileng bakeng sa meloko e tlang.

"Re ke ke ra lumela hore bana ba rona ba emele bokamoso bo neng bo ka ahoa ke rona kajeno."

Khakanyong ea lichelete ea selemo sa 2026/27, lichelete li abetsoe mafapha a fapakaneng ka tsela ena, M2.1Billion li abetsoe litse-la le meaho ho ntlafatsa marang-rang a lipalangoang le meaho ea sechaba.

M1.1 Billion li abetsoe Temo ho matlafatsa polokeho ea lijo le tlhahiso ea balemi. M2.4Billion li abetsoe Metsi ho ntlafatsa phano ea metsi le merero ea metsi naheng ka bophara.

M1.7Billion li abetsoe Matla (Energy) ho tšehetsa merero ea motlakase le mehloli e meng ea matla. M386.4Million li abetsoe 'Technology' ea Tlhahiso-le-seling le Puisano (ICT) ho matlafatsa phetoho ea 'digital'.

M3.1Billion li abetsoe Bophelo ho ntlafatsa litšebeliso tsa bongaka le tlhokomelo ea bakuli. M3.5 Billion ea abeloa Thuto, ho tšehetsa likolo, litichere le boleng ba thuto. M150Million li abetsoe Lipapali ho ntšetsapele talenta le meaho ea lipapali. M155Million li abetsoe Bohahlali le Setso ho phahamisa bohahlali le ho sireletsa lefa la setso.

Ke hona mona moo koranta ena e bileng le puisanong le Moetapele oa UAT, Dr. Mahali Phamotse, ea hlalositse hore likhanyo tsena ke puo e tloaelehileng kaha li sena phetoho e teng ho tsona. O re litaba tse 'maloa ke tšotleho e kholo ea sechaba, h'a sheba hore na mesebetsi ea sechaba e sebetsoa joang, koetliso ea bacha, thuto le ntlafalo ea bona 'moho le litaba tsa lipapali.

O re h'a khotsofala mafapheng ana kaofela hobane ba ntse ba etsa mesebetsi, o re ho buuo ka likoetliso ha ho theoe mesebetsi. A re mesebetsi ha eeo ka lefatše ka bophara empa naha e lokela ho sheba linaha tseo e ka sebetsang le tsona ho theha mesebetsi.

MOELETSI O TŠEHETSA BACHA

**TJANTJELLO
LE LIKHOTHALETSO**

Tšeliso Thakholi

David Nthakanya-ne ea hlahetseng le ho holela Maputsoe Seterekeng sa Leribe, ke mocha ea nang le talenta ea ho loha le ho roka likatiba ka mefuta ea tsona. Ha se ntho eo a ithutetseng eona sekolong ke mpho eo a e filoeng ke Morena Molimo, hobane motho o lokela ho phela ka mofufutso oa phatla ea hae. Har'a tse ling tse ngata tseo a li etsang ke likatiba tsa ulu, likepisi le lipoti tse ntle ka tsela e makatsang. O boetse o ngola le ho 'daea' liphahlo tse thuntseng ka mebala eohle eo moreki a e batlang.

QALEHO

Hantle ke qalile mosebetsi oa ho roka lipoti ha ke qeta ho etsa sehlopha sa bosupa. Ke ile ka kopa batsoali ba ka ho nkisa sekolong sa mosebetsi oa matsoho sa LOIC, Maseru, moo ke ithutseng ho betla lepolanka le moaho. Ha ke ntse ke le moo sekolong, ke ile ka 'na ka ntšetsa pele talenta ena ea ka, ka ho rokela baithuti likatiba tsa ulu ka mefuta ea tsona, haholo-holo tsena tse ratoang ke mofuta oa Marasta, ebe b'a ntefa, ke atleha ho fumana chelete ea ho reka lijo kaha ke ne ke sa lule ka sekolong, ke ne ke ke hirileng. Ke hona moo ke ileng ka hlokomela hore talenta ena e ka ntsoela molemo.

ka, a se a rekile mochini o mocha o rohang le ho loha likatiba. Malome eena o roka li-suiti tsa mekete, tsa mafu le manyalo le ho lapa mese le marikho a batho h'a tabohile. A nkhothaletsa ka matla ho ikakhela ka setotsoana mosebetsng oa ho loha le ho roka likatiba. A ba a eketsa ka ho nthuta mosebetsi o mong o mocha oa ho 'daea' liphahlo ka mefuta tse seng li thuntse le tse tsofetseng ke li busetsa bocheng. Taba eo ke neng ke

etse sekolong ka e tlohela, 'me ka bona hore mosebetsi oo ke o rometsoeng lefatšeng ho tla o phetha ke oa ho roka.
Ho bua 'nete kholong ea

se tlang ha khoebo e ntse e hola ke lokela ho rokela le ho ea rekisa literekeng tse ling tse kang Maseru, Mafeteng, Mohale's Hoek le Quthing. Ka letsatsi ke re-

la, ke ea tsamaea ke il'o li etsa. Etsoe nonyana e ahe-la ka litšiba tsa e 'ngoe. E bile ke ntse ke tsoelapele ka matla a maholo. Hajoale re bararo feela, ba bang batla



ka ke ne ke sa nahane hore ke na le talenta ea ho roka le ho loha, empa ke leboha malome oa ka haholo ea ileng a mpula mahlo le ho nthatisa khoebo ena. Ke se ke kene lithupelo tse ngata tsa ho roka le ho 'daea' liphahlo le masela kamor'a hore ke ele hloko hore kena le talenta e joalo.

KHOEBO

Khoebo ea ka e tsamaea hantle haholo 'me malome o nkhothaletsa hore selemong

kisa likatiba tse 100 ho isa ho 200 ho kenyelelitse lipoti, likepisi le tsa ulu tse lohiloeng ka makhetha a maholo.
Ho hlake hore mona re etsa likatiba tsohle tsa mekha le makhotla a lipolotiki le tsa maitereko ntle le tsa makhotla ana a libini tsa Sesotho a thibetsoeng ka molao. Ke holisa khoebo ena ka hore ha ke ntse ke tsamaea hohle kahar'a toropo ke rekisa, ha ke bona ntho e nkhang e ka ba ke setšoantšo kapa mofuta oa lese-

ha mosebetsi o le mongata.
HO HIROA
Ka 'nete ha kena takatso ea ho hiroa kaha toro ea ka e le hore ka letsatsi le leng ke be ke e-na le feme e kholo ea likatiba le ho 'daea' liphahlo ho li busetsa bocheng ba tsona. Se nthabisang ke ho bona batho ba bangata ba ntšehelitse.

QHOLOTSO

Ha ke e-s'o be le liqhilotso tse ngata haholo empa hajoale ke sebeletsa ka mok'huk'hung 'me nka rata ho iphumana ke ena le phaposi tse tharo tsa moaho tse tla etsa hore ke etse mosebetsi hantle. Ka hona ke kopa lithuso le tlatsetso ho batho bohle ba boithatelo bo bottle esitana le likampani ho jela paate, e le hore neho le tsebo ena ke tle ke li siele bana ba Basotho.

**KELETSO
HO BACHA**

Bacha ba heso emang ka maoto le sebelise litalenta tseo Morena Molimo a le fileng tsona e le hore le tle le tsebe ho iphelisa. Re kopa 'muso ho tšehetsa bacha ba seng ba ena le likhoebo le ba nang le morero oa ho li qala kaha ka ho etsa joalo o tla be o thusa ho matlafatsa li talenta tsa bacha e le hore ba tsebe ho iphelisa le ho holisa moruo oa naha.



Ba tsoa tsoku tlaase

Tšelisio Thakholi

Motlatsi oa Raliphatlatso oa Sethala sa Thalaboliba ea Ntlafatso ea Moruo(RFP), e bile e le setho sa Ntlo ea Bakhethoa ba Sechaba Thabo Maretlane o re tahlehelo ea litho tsa bona tse tharo e ba rahile maling a mpa, empa ha hona letho leo ba ka le etsang, ba se ba nkile qeto ea ho tsoa tsoku tlaase, ba leba moo ba ratang. O buile tsena puisanong le Koranta ena kamor'a hore litho tse tharo tsa RFP li tšelele Lekhotleng la Puso ea Sechaba (DC) le la Liketso le Bophethahatsi (BAP) ka Lekhotleng la Ntlo ea Bakhethoa ba Sechaba Maseru, ka Mantaha oa la 16 Hlakola 2026.

Maretlane o re litaba tseo ba ntseng ba li bua ha se tsa 'nete kaha lipalo tsa bona li ntse li nepahe-tse bakeng sa ho tsamaisa puso, 'me ba ntse ba itšebelsetsa hantle le ho hlomphe moetapele oa bona ebile e le Tona-Kholo. A re



litaba tseo ba ntseng ba li bua tsa hore ho boetse ho tlii'o itokolla bakhethoa ba bang ba 21, ke mafosisa ao a itseng a tsoana hantle le ha mohlankana a se a sa batle khabere ea hae, eba o se a ntse a e neta ka lintho tseo e seng tsa 'nete hohle moo a tsamaeang teng.

Leha ho le joalo, "re tla re ke lipitsi ha re li bona, empa ha joale, RFP e tsitsitse, tseo ba ntseng ba li bua ke maikutlo a bona, rona re ntse re itsoellapele ho sebeletsa sechaba ho fihlela lilemo tse hlano li fela." A ipiletsa ho litho tsa habo tse khabane ho kho-ba matsoafo hoba sena ke

sefeto se tlang ho iphetela, joaloka tse ling.

Litho tse tšeletseng makhotleng a mang ke Mokhethoa oa Lebatooa la Abia Thuso Makhalanyane ea tšeletseng ka ho DC, ha Mokhethoa oa Peka Mohopoli Monokoane le oa lebatooa la Matala Dr. Tšelisio Moroke ba tšeletse ka ho BAP.

Har'a tse ling tse ngata litho li re li fihletse qeto ena e sakang ea eba bonolo ho e fihlela, ka lebaka la tsamaiso e mpe ea RFP. Litho tsa re li siea RFP hobane li hlokometse hore moetapele



oa RFP o sitoa ho nka likhato khahlanong le liketso tseo ba lihlalosang e le tsa bobolu tseo ba reng li ntse li ehloa mekoalaba.

Ba boetse ba qosa moetapele ka ho hloleha ho phethahatsa litšepiso tseo ba ileng ba lietsetsa sechaba pele ba kena pusong, le ho hloleha ho sireletsa lithahasello tsa RFP.

Litho tsa boele tsa re li siea RFP hobane li bona bohatheli bo tsoileng matsoho ho tsoa ho moetapele oa Sethala, litho li ile tsa meketsa ka nako e telele ka hore kabo ea mesebetsi e lokela e anele bohle, empa li hlotsoe hobane boetapele bo bonahala bo sa ikemisetsa ho sebeletsa hore sechaba sa Basotho, moruo le kabo ea mesebetsi li anele bohle, haese lithathatsi tsa bona feela joaloka metsoalle le baamani le bona.

Litho tsa re palo e ngata ea litho tsa RFP ha e'a khotsofalla boetapele, 'me e ntse e itokisetse ho siea Sethala ka lebaka la ho hloka ponaletso le ho hloleha ho phethahatsa litšepiso tseo o li etselitseng litho.

Seboholi sa Lekhotla le etelletseng bohanyetsi pele,

Lekhotla la Puso ea Sechaba (DC), Monghali Serialong Qoo, puisanong le Koranta ena o tiisitse hore tsela eo 'muso o tšoereng tsamaiso ea puso ka teng, ke hona ba sa ntse ba tlii'o amohela litho tse ling tse 'ne tsa RFP tse tlii'o boela li tšelela ka ho DC. Empa o bile sechele ho li bolela, ka le reng nako ha e-s'o fihle.

O re ke hona litho li qalang



ho fahloloha hore li ne li ile lekhotleng lesele, 'me kajeno li khutlela makhotleng a habo tsona. A ipiletsa ho litho tsa habo tsa DC hore li ba amohela ka liatla se peli le matsoho a mofuthu. Li ba rute molao oa motheo le ho ikokotlela ka ona ka linako tsohle.

Machesetsa o ema le bahlanka ba litsi tsa tšireletso

Nthabeleng Seithleko

Moetapele oa BNP Mohlomphehi Machesetsa Mofomobe, o re basebetsi ba likhoebo tse ikemetseng tsa tšireletso ba tlotsing kaha ba sa lefshoa nakong ea likhoeli tse tharo, hoo ba ileng mafelong a selemo litšiba ho lla tse ka mahafing, ho se lijo malapeng a bona. O boletse tsena tulong ea Paramente ka la 17 Hlakola monongoaha.

O re taba ena e bakile bolutu malapeng a basebetsi bao, hoo ba bang ka lebaka la bohloko le ho imeloa ke bophelo ba ikhapelang lithepa le ho nka bophelo ba beng ba likhoebo tse joalo. O re ntho e kholo ke hore 'muso o kolota likhoebo tse joalo nako e telele hoo li sa atleheng ho lefa basebetsi.

Mofomobe o re qholotso ena e kholo hobane e ama bophelo bo botle ba sechaba, moruo oa naha hobane ba bang ba hirile matlo a bolulo 'me ha ba sa atleha ho a lefa. O re ho'a nepahala hore 'muso o lefe likhoebo tsena, e le hore li atlehe ho arabela lithoko tsa bona tsa kamehla.

A re basebetsi ba lik-

hoebo tseo ba sebetsa joaloka makhoba, kaha le libaka tseo ba sebetsang ho tsona li beha bophelo ba bona tlotsing. O re ba bang ba qetile likhoeli tse hlano ba sa fumane meputso, e leng se etsang hore ba be lipelo li bohloko tse eket-sang bosholu le lipolao.

Ke hona tabeng tsena

moo Letona la Bophelo, Mohlomphehi Selibe Mochoboroane a hlalositseng hore lekala la habo le hirile likhoebo tse 'maloa tsa tšireletso mafapheng a bona, 'me hona le nako eo ba sa lefshoang ba kolotoa hobane ho bile le phalliso ea mafapha a mang a neng a ikarabella ho bona.

57396597
28 350 815

Mazenod PRINTING WORKS (Pty) Ltd
Printing & Stationery Solutions

28 350 466
lesaoanat@gmail.com

Malebela

Scan me

U se u ka fumana buka ea Malebela ho marang-rang a boletsoeng ka tlase kapa oa sebelisa code e kaholimo.

"Get the Akello app on Play Store, App Store, or Huawei App Gallery for Mazenod books and more. Download now!"

<https://library.akello.co/downloads>

akello



Lefapha leo le ne le sebetsa ka chelete e nyane hoo ho ileng ha ama ho lefshoa ha likhoebo tse joalo, ba ne ba sebetsa ka chelete e kaalo ka M114Millione. A re ka chelete ena ba atlehile ho lefa likhoebo tseo nakong ea likhoeli tse hlano feela 'me likolotoa likhoeli tse tšeletseng.

Ha Letona la Khiri le Bosebetsi Mohlomphehi Tšelisio Mokhosi, o hlalositse hore ba na le linyoe tse 22 tsa likhoebo tsa tšireletso, ba imetsoe kaha bahlalobi ba le 34 feela ba sebeletsang naha ba sitoa ho etsa tšalo morao ea litaba. Ba fumane hore bahoebi ba likhoebo tse joalo ba boetsa ba lefa basebetsi

bao meputso e tlaase ho eo 'muso o e behileng.

Mosebetsi oa lekala o mongata ha ba shebane le litaba tsa kholo ea tšebetso ea bona, basebetsi ba lekala ba imetsoe. Ba sitoa ho hira basebetsi ba lihalala-hala hobane ke ba nakoana, ba hloka ho koetlisoa hore ba tsebe ho etsa mosebetsi, nako ea bona e tla feela ba e-s'o etse mosebetsi o lebelletsoeng.

"Linyoe li tsamaea butle hoo mohiri a beng a koale khoebo a ntse a kolota basebetsi le motho ea tsekang lichelete tsa hae a be a hlokahale, ho se tharollo e fihletsoeng bothateng ba hae ba lichelete" ke Mokhosi eo.

Ba entela lefu la molomo oa popelo



Tseliso Thakholi

Ke bana ba ba-nana ba 111 ba fumantšitsoeng liente tse thibelang lefu la mofetše oa molomo oa popelo, letšolong le bileng seterekeng sa Mafeteng mafelong a beke e fetileng. Letšolo lena le ne le tšehelitsoe ke Setsi sa Le-Coop ka tšebeliso 'moho le mokhatlo o shebaneng le ho fetisa thuto ka litaba tsa bophelo bo bottle le tikoloho o bitsoang Paballo-ea-Bophelo, e le ho tšehetsa Lekala la Bophelo mohatong oa lona oa ho netefatsa hore bana bohle ba fumana ente ena ka nako.

Ke bashanyana le banana ba 227 ba ileng ba fumantšoa ente e thibelang tsitsipano ea 'mele, 'me e ne e fuoa feela bana ba lilemo tse 6 ho isa ho tse 8. Ka hona kakaretso ea bana ba fumantšitsoeng liente letšolong lena e bile 338. Letšolo le ile la tšoaroa libakeng tse 15 tsa Setereke sa Mafeteng, tse kenyeletsang metse le likolo tse kang; Raliemere, Qobete, Likhoele, Boitelo, Matsepe, Little Bean, Molleloa, Excellence Academy, Stepping Store, Tauhali, Tsaeng, Bofihla, Maboloka, St Gerard le Leratong.

Mooki oa Setsi sa Le-Coop ea neng a etelletsepele letšolo lena, Mofumahali Limakatso Radebe o itse lefatše le iphetse meoloane ea hore ka selemo sa 2030 bonyane 90% ea

banana ba fihlang lilemong tse 15 ba be ba se ba fumane ente ena. A re hajoale banana ba bangata ba fuoa mokhahlelo o le mong feela oa ente, ntle le ba tlokotsing e phahameng haholo, e leng ba phelang le kokoana-hloko ea HIV le ba tšeroeng ke lefu la tsoekere.

"Bona re ba fa ente ka mekhahlelo e meraro, mokhoa oa pele le oa bobeli kamor'a matsatsi a 28, ebe oa boraro kamor'a likhoeli tse 6, e le ho leka ho fokotsa sekhahla sa tšoaetso ea mofetše oa molomo oa popelo." O boletse joalo a bile a eketsa ka hore ba khotaletsa banna ho rola katiba kaha ba ka fetisa kokoana-hloko ea lefu lena habobebe ha ba sa rola katiba.

A re mekhoele e meng ea ho

thibela ho ata ha mofetše oa molomo oa popelo e kenyeletsa ho fa banana le bashanyana thuto e nepahetseng ka litaba tsa thobalano le ho ba khotaletsa ho se qale ho etsa pele ho nako.

Mongoli-kakaretso oa Paballo-ea-Bophelo, Mofumahatsana Pascalinah Kabi o qalile pele ka ho leboha ka tsela e khethileng batsoali le baholisi ba bana, ka ho ananela pitso ea Setsi sa Le-Coop ha se kopa tumello ea hore bana ba fumantšoe liente tsa thibelo ea mofetše le tsa tsitsipano ea 'mele.

A re kakaretso ea litšenyehelo tsa letšolo la kentelo likolong tsa Mafeteng e bile M10,000.00 ka matsatsi a mahlano. A re chelete ena e kenyelelitse theko ea liente, 'me e le tlaase haholo ha

e bapisoa le litšenyelo tsa ho alafa mokuli a le mong oa mofetše. "Ho hlake hore M10,000.00 ena e kenyeletsa le ea bana ba 227 ba ente ea tsitsipano ea 'mele. Sena se totobatsa hore ho thibela ho litšenyehelo li tlaase ha ho bapisoa le ho alafa mokuli oa mofetše." Ke eena eo h'a phethela puo ea hae.

E mong oa baoki ba bileng teng letšolong lena Mofumahali Susan Ramakhunoane o boletse hore ho bohlokoa hore bana ba fumane liente, hobane ngoana ea sa entoang ha lefu le thibeloang ka liente le ka mo tšoara, le mo tsukutla habohloko hoo ba bang b'a be ba lahlehelo ke bophelo.

Ke lekhetlo la boraro ka tatellano Mokhatlo oa Pa-

ballo-ea-Bophelo o tšehetsa Litsi tsa Bophelo le ho sebetsa le sechaba, e le ho netefatsa hore bana ba saletseng morao ka liente b'a li fumantšoa. Ka Pulungoana ngoahola Setsi sa Le-Coop se ile sa enta bana ba 78 ba katlaase ho lilemo tse hlano ka tšehetso ea Paballo-ea-Bophelo.

Mokhatlo ona o boetse oa tšehetsa Setsi sa Malikaliko seterekeng sa Mokhotlong ho fumantša bana ba 78 liente, ba katlaase ho lilemo tse hlano mathoasong a selemo sena. Ho feta moo, mokhatlo o boetse o entse selekane le lihlopha tse peli tsa bolo ea maoto literekeng tsa Berea le Mokhotlong, e le ho matlafatsa matsapa a ho khotaletsa le ho thusa bana ho fumantšoa liente.



LHDA e thakhola mokete

Tšeliso Thakholi

Morero oa Metsi a Lihlaba tsa Lesotho ka kopanelo le Katse Dam Action Aid Community Forum li thakhotse mokete o moholo oa bochaba le bohahlaoli oa Katse Dam Tourism Festival, o reretsoeng ho pepesa bochaba ba Basotho le ho hohela bohahlaoli ho hlaha kantle le kahare ho naha. Tsena li etsahetse 'mokeng oa baphatlalatsi ba litaba o bileng Lancer's Inn, Maseru, ka la 17 Hlakola 2026.

H'a bua 'mokeng ona Mookameli oa LHDA, Monghali Tente Tente o boletse hore ba motlotlo haholo ka mokete oa mofuta ona, kaha o tliil'o fetola bophelo ba Basotho ba phelang Ha Katse, ho bopa sechaba ho se etsa ngatana-'ngoe le ho sebetsa 'moho le LHDA. "Etsoe LHDA ke morero oa ntlafatso o etselitsoeng hore sechaba se se ke sa utloa



bohloko empa se imone monoana ka ona." A rialo.

H'a tsoelapele a bontša hore bochaba le bohahlaoli ke lintho tsa bohlokoa haholo, 'me li kopantsoe le mokete oa boithabiso hobane morero ke ho hohela moloko o mocha, "empa karolo e kholo ea mokete ona ke bohahlaoli kaha bo etsa hore sechaba sa Basotho se phelang metseng mane se tsebe ho imona menoana ka tsohle tseo ba tlabeng ba thabisa bahah-

laoli ka tsona."

A re ho tsoarana ka matsoho le sechaba ka komiti ea sona ea tokisetso ea mokete ona, ke pontšo ea hore LHDA e ntse e matlafatsa a mang a maano a eona a ho sebetsa ka mofuthu le sechaba. "Re batla ho felisa lipuo tse mona tse tloaelehileng tsa hore sechaba se anngoeng ke morero, empa re re sechaba se sebetsang 'moho le morero molemong oa ho ntlafatsa bophelo ba sona." O boletse joalo a bile a phethela ka ho tiisa hore ba tsoanela ho sebetsa 'moho kaha mosebetsi oa bona o tsamaea le ntlafatso ea sechaba le ntšetso pele. "Re le ba Morero re tsebahala haholo ka matamo a maholo a matle tikolohong ea Afrika, empa seo re se etsang ka mokete ona ke ho holisa le ho matlafatsa tšebeliso 'moho le sechaba."

Molula-Setulo oa Komiti e hlophisang mokete oa Katse Dam Tourism Festival, Monghali Selikane Rakwane, eena o thoholelitse LHDA ka tšebeliso e mo-

futhu le sechaba le ho kenya letsoho le toma ho atlehisa mokete ona. A re Katse ke sebaka se fupereng manoni a bohahlaoli Naheng ea Lesotho. Ka hona se tsoanela ho bapatsa bochaba ba Basotho le bohahlaoli ka linako tsohle e seng ka mekete e kang ena feela.

"Bahahlaoli kahare le kantle ho naha ba lokela ho hlaha ka likanta tsohle tsa Lesotho ho tla boha botle ba matamo a Lesotho le botle ba tlholeho. Ba ke ba tliil'o hema moea o monate o hloekileng oa lihlaba tsa Lesotho." A rialo. A re mokete ona o tliil'o ntlafatsa bophelo ba Basotho kaha bo isa chelete ka lipokothong tsa Basotho. A re lichelete tse bokeletsoang moketeng ona li thusa mererong e fapakaneng ea sechaba sa Katse le ho arabela litlhoko tsa Basotho ba kojoana li mahetleng.

A bontša hore lichelete tsa mokete li sebelisoa hona mohlala letsatsi la mokete, bakeng sa ho fana ka limpho ho ba hlotseng litlholisanong tsa lipapali tsa

Sesotho le mesebetsing e meng ea sechaba, hobane mokhatlo oa bona o sa etse liphaello empa o thusa ho ntlafatsa bophelo ba sechaba.

A qetella ka ho bontša hore mokete ona ke oa matsatsi a mararo 'me letsatsing la pele e tla ba litlholisanong tsa lipapali tsa Sesotho ka likolo tsa tikoloho ea Katse, letsatsing la bobeli e tla ba tsona lipapali tsa Sesotho ka sechaba se phelang Katse, ha letsatsing la ho qetela e tla ba la hore bahahlaoli ba bohe botle ba tlholeho, ho palama lipere le ho etela sechaba metseng ho ea robala matlong a Sesotho le ho ja lijo tse lutlisang mathe tsa Sesotho.



Lekala le tla kiba-kiba

Nthabeleng Seitlheko

Le hoja moruo oa naha o lebelletsoe ho hola butle ka 1.5% selemong sa lichelete sa 2027/28 ho ea ka likhakanyo tsa nako e mahareng, mafapha a temo le a tlhahiso ea (manufacturing) a lebelletsoe ho bontša kholo.

Sena se boletsoe ke Letona la Lichelete le Moralo oa Nts'etsopele, Dr. Rets'elisitsoe Matlanyane h'a ne a fana ka Tekanyetso ea 2026/2027 ka pel'a kopano e kopanetsoeng ea Paramente tlasa sehlooho se reng: "Ho Potlakisa Phetoho ea Moruo: Ho Haha Botsitso." Ka la 18 Hlakola monongoaha.

'Muso o abetse lefapha la Temo chelete e ka bang M1.1Billion ho matlafatsa polokeho ea lijo, ho phahamisisa tlhahiso le ho tšehetsa mekhoe ea temo e tsitsitseng. Ts'ebeliso ea lichelete selemong sa 2026/27 e tla tsepamisisa maikutlo ho eketseng tlhahiso ea lijo, nts'etsopele ea nosetso, tšireletso ea mehlape le ho matlafatsa liketane tsa bo-

leng ba lihlahisoa tsa temo.

Ho ntlafatsa tlhahiso ea lijalo, 'muso o tla tšehetsa masimo a 'share-cropping' ka ho fana ka mechini ea temo e theko e tlase e amohelang, ho kenyeletsoa lisebelisoa tse rekiloeng China le Republic ea Korea. Sena se reretsoe ho atolosa masimo a lengoang le ho ntlafatsa bokhoni ba tlhahiso. Setsi sa Polokelo le Tsamaiso ea Lihlahisoa sa Maseru se tla qalisoa ka botlalo ho matlafatsa polokelo ea lijo tsa naha le taolo ea lihlahisoa ka mor'a kotulo.

Ho ts'ehetsa temo e mamehang phetoho ea maemo a leholimo, 'muso o tla theha merero ea nosetso bonnyane libakeng tse robeli ho tsitsisa tlhahiso, ho fokotsa ho itšetleha ka pula le ho nolofalletsa temo selemo ho pota libakeng tse khethileng tsa lijalo.

Ho sireletsa mehlape, lichelete li tla tšehetsa lenaneo la naha la mahala la ente khahlanong le mafu a Sheep Scab le Anthrax, ho matlafatsa taolo ea polokeho meeling, le ho lokisetsa ho thehoa ha Laboratori ea Naha ea Tlhahlobo ea Maloetse a Liphoofolo.

Karolong ea boea le mohair lichelete li tla tšehetsa

tsoelo-pele ea Lenaneo la ho atisa Merino le ntlafatso ea Setsi sa Artificial Insemination sa Quthing, ho kenyeletsoa ho kenya mochini oa Liquid Nitrogen, ho ntlafatsa boleng ba fiber, tlhahiso le meputso ea baahi ba mahaeng. Mehato ena e reretsoe ho matlafatsa Lefapha la Temo hore le be le ts'epo, le hlahise mesebetsi le ho kenya letsoho kholong ea moruo oa naha.

Ho sa le joalo Letona la Temo Kanetso ea Lijo le

Phepo e Nepahetseng, Mohlomphehi Thabo Mofosi, o hlalositse hore o motlotlo ke chelete eo lekala la habo le e abetsoeng, morero o moholo ke ho khothaletsa bacha ho kena temong ea liphoofolo hore ba ithahisetse mesebetsi ba bone hore ba ea iphelisa ho fenyaa litaba tsa tlhokahalo ea mesebetsi.

O re mosebetsi ona ba u etsa ka ho fana ka lithupelo ho bacha le ho bona hore SADP ka ts'ehetso ea eona ho lihoai tse ntseng li thuthuha e ts'ehetsa tlhahiso ea bacha le ho bona

hore likhoebo tsa bona li ea ntlafala.

O re selemong sena o thabile hobane bacha ba bonahala ba hlahella haholo litabeng tsa tlhahiso le ho phamolela litaba tsa boitjaro holimo. Ba ntse ba sebeletsa ho bona hore hoba le mekhoe e tla ba thusa hore ha ts'enyoe e bile teng ea sehoai, thepa e be kahar'a lekuka la 'insurance', hore ba se ke ba senyehelaoa ebe ha ba atlehe ho buseletsoa, eleng se nyahamisang batho ba bangata ka lebaka la litlamorao tsa phetoho ea boemo ba leholimo.



Babusi ba litereke ba tsoma tharollo

Nthabeleng Seithleko

Babusi ba Litereke ho pharalla le naha, hammoho le Baokameli ba Baholo ba lipasa, ba kopane Mohale's Hoek, ka sepheo sa ho batla tharollo mathateng a bakileng tiehiso le ea ho ntšoa ha lipasa liofising tse fapakaneng tsa naha ka la 17 Hlakola monongoaha.

Puong ea hae 'Musi oa Setereke sa Mohale's Hoek Moleboheng Lebele, o bontšitse hore taba ea tiehiso ea phano ea lipasa e se e le moqoqo o atileng sechabeng, batho ba bangata b'a tletleba ka ho leta nako e telele pele ba fumana lipasa tsa bona. O itse ke nako ea hore baokameli ba litereke ba batlisisa sesosa sa bothata bona.

Lebele o hlalositse hore ba fumane hore liofisi tse ling li tobane le khaello ea lisebelisoa tsa motheo tse kang 'stationery', 'computers', hammoho le tlhokahalo ea meaho ho sebeletsa sechaba ka nepo. O itse mathata ana a ama tšebetso ea letsatsi le letsatsi, 'me a baka tiehiso tšebetsong.

O boetse a totobatsa hore phepetso e kholo ke khaello ea basebetsi lefapheng la tlhahiso, moo lipasa li hatisoang teng. Leha ho le joalo, o boletse hore mohato oa pele o se o nkiloe ka ho hira basebetsi ba nakoana ho thusa ho fokotsa moralo oa mosebetsi le ho potlakisa tšebetso.

Ho ea ka Lebele litereke tsohle li khothalelitsoe ho romela likopo tsohle tsa lipasa Lefapheng la Tlhahiso Mohale's Hoek bakeng sa khatiso, e le ho etsa bonnete ba hore tšebetso e laoloa sebakeng se le seng. O boetse a re kamor'a matsatsi a phomolo a Paseka, babusi ba litereke ba tla boela ba kopana ho lekola tsoelo-pele e entsoeng, le hore na mehato e nkiloeng e se e fane ka litholoana life.

Qetellong baokameli ba litereke ba fihletse qeto ea hore Baokameli ba lipasa ba be tlas'a taolo ea babusi ba litereke, e le hore ha liofisi tsa lipasa li haelloa ke tekanyetso kapa lisebelisoa, ba ka thusoa ka lichelete kapa ka lisebelisoa tse tsoang tekanyetsong ea liofisi tsa Babusi ba Litereke tse joalo. Sena se lebelletsoe ho matlafatsa tšebelisoano 'moho le ho netefatsa hore litšebeliso e ba tse potlakileng.

Ka lehlakoreng le leng



puisanong le Moemeli e Moholo oa lipasa Mohale's Hoek, 'Malerato Ramalaka, o netefalitse hore Setereke sa Mohale's Hoek ha se na mathata phanong ea lipasa hona joale. O lebohile boitekoko ba babusi ba litereke, a

re hangata batho ba kantle ho ofisi ha ba utloe khatello le mathata a tobaneng le basebetsi ba kahare.

Ramalaka o itse khato eo babusi ba litereke e nkileng, ke qaleho ea tharollo eo bothata ka ho sa feleng.

O boetse a re baokameli ba litereke ba ikemiselitse ho phahamisetsa taba ena maemong a phahameng a puso, hore ho fumanoe tharollo e tsoarellang e tla ntlafatsa tšebeliso ea libukana tsa ho eta naheng ka

bophara.

Sebaka sena se lebeletsoe ho tliša liphetofo tse tla nolofaletsisa sechaba ho fumana lipasa ka nako, ho fokotsa litletlebo le ho matlafatsa tšepo ea sechaba litšebeliso tsa 'muso.

Ho se lefshoe ho ama bophelo

Tšeliso Thakholi

Tšebetso e ntseng e tsoela pele ea ho netefatsa bophelo ba maqheku le maqhekoana (Old Age "Proof of Life") e bakile hore maqheku le maqhekoana a 4,179 a setereke sa Maseru a se ke a lefshoa litsiane tsa bona tsa khoeli ea Hlakola. Sena se boletsoe ke Letona la Tekano, Bacha le Ntšetsopele ea Sechaba, Mohlomphehi Pitso Lesaoana, polelong eo a e balileng tulong ea Paramente ka la 16 Hlakola monongoaha.

Lesaoana o boletse hore tšebetso ena, e qalileng ho etsoa lekhetlo la pele ho tloha ha morero oa penshene o qaloa selemong sa lichelete sa 2021/2022, kamor'a litletlebo tsa hore batho ba bang ba ntse ba amohela penshene ka tsela e seng molaong.

O hlalositse hore pokello ena ea lintlha e entsoe litsing tse 42 ho kenyeletsa le Setereke sa Maseru, moo batho ba baholo ba 18 429 ba ileng ba ingolisa, ho sa kenyeletsoe ba lulang libakeng tse ka maluting.

Letona le ile la hlakisa hore ba amohelang penshene ba ne ba tlameha ho ingolisa litsing tseo ka tloaelo ba fumanang tefo ea bona ho tsona. Ba neng ba sa atleha ho itlhahisa ka lebaka la botsofali bo feteletseng ba ile ba ingolisa ka baemeli ba bona. O ile a boela a bontša



hore ho tloha ha tšebetso ena e qala ka Phato, batho ba baholo ba 13 074 ba ne ba se ba ingolisitse ho fihlela ka Tšitoe selemong se fetileng.

O ile a phaella ka hore Lekala le ile la hopotsa bohle ba neng ba e-s'o ingolise hore ba etse joalo pele ho la 10 Pherekhong 2026, empa leha ho le joalo, batho ba 4 179 ba ile ba hloleha ho ingolisa 'me ka lebaka leo ba tlosoa lethathamong la tefo ea khoeli ea Hlakola.

O bile a netefatsa hore Lekala le ntse le sebetsa ka thata ho netefatsa hore bohle ba amehileng ba in-

golisa, a kopa tsoarelo ka tiehiso ea litefo e ileng ea eba teng ho ba amohelang Mpesa.

Ho sa le joalo, tšebetso e tsoanang ea ho netefatsa lintlha tsa batho ba baholo e ntse e tsoelapele le literekeng tse ling tse kang Maseru, Berea le Mafeteng har'a tse ling, ka sepheo sa ho netefatsa hore ba lokelang ho fumana penshene ke bona ba hlileng ba e fumang.

Ho sa le joalo, Katleho Mabeleng o hlalositse hore liphetofo tse ling li ama mafutsana a mangata, hobane ba sena bokhoni ba ho ea libakeng tse fapakaneng

hore ba ingolise. A re ho bohlokoa hore lekala ha le tla ka liphetofo le ele hloko batho ba lulang libakeng tse hole haholo moo ho tsamauoang ka boima.

A re ho se fumane litsiane ha karolo e 'ngoe ea maqheku khoeling ena ho ama bophelo ba bona, kaha ba bang ba phela ba ka litsiane tse joalo. Ho bohlokoa hore naha ea Lesotho e ntlafatse mekhoha ea ho fihlela le batho ba se nang bokhoni.

Ka lehlakoreng le leng khakanyong tsa lichelete tsa la 18 Hlakola monongoaha, Dr. Retšelisitsoe Matlanyane o ekelelitse maqheku le maqhekoana ka M50.00.

UNDP le IEC li tiisa maqhama

Nthabeleng Seithleko

Komisi e lke-metseng ea Likhetho (IEC) e amohetse Moemeli oa Mokhatlo oa Machaba a Kopaneng oa Ntšetsopele (UNDP), Dr. Jacqueline Olweya, ea etetseng Bakomishenara ba IEC ka la 16 Hlakola 2026.

Kopano ena e file UNDP monyetla oa ho buisana le Komiti e sa tsoa khethoa, ka pono le maano a eona, ebile tl'o tiisa tšebeliso 'moho pakeng tsa UNDP le IEC ho matlafatsa puso ea sechaba ka sechaba Lesotho.

Lipuisano li shebane le ho matlafatsa bokhoni ba mekhatlo le boikarabello, ho tšehetsa likhetho tse tšepahalang, tse kenyeletsang bohle, hammoho le ho potlakisa ho thehoa ha ngoliso ea bakhethi e nepahetseng, e fumanehang habonolo le e kenyeletsang bohle, ho sireletsa botšephehi ba likhetho Lesotho.

Dr. Olweya o ile a tiisa boitlamo ba UNDP ba ho sebetsa haufi-ufi le IEC ho ntšetsapele puso ea sechaba ka sechaba, ho matlafatsa mamello ea mekhatlo, le ho khothalletsa tšepo ea sechaba tsamaisong ea likhetho ea Lesotho. IEC e ile ea totobatsa libaka tsa bohlokoa tsa tšebeliso tse tšehelitsoeng ke EU-UNDP, ho kenyeletsa Seboka sa Mohlala oa Likhetho (Electoral Model Symposium), thupelo ea netefatso ea Leano le Lecha la Ngoliso ea Bakhethi, le tšehetso ea ho matlafatsa tsamaiso tsa 'digital' tsa IEC, ho kenyeletsa ntlafatso ea sebaka sa marang-rang sa IEC.

Kopano e boetse ea sheba mehato e tsoelang pele ea ho matlafatsa bokhoni ba basebetsi ba IEC le Ngoliso ea Naha le Ngoliso ea Boitsebahatso (NICR) le ea litsamaiso tsa ICT le tšebetsong ea ngoliso ea bakhethi. IEC e ile ea tsebisa UNDP ka thupelo ea boetapele le taolo bakeng sa Bahlan-ka ba Baholo ba Likhetho ba Setereke (SDEOs) e neng e tsoaretsoe Tha-



Likhakanyo li mometse ho bacha

Nthabeleng Seithleko

Moetapele oa Lekhotla la Puso ea Sechaba (DC) ebile e le Moetapele oa Bohanyetisi, Mathibeli Mokhothu o re likhalanyo tsa lichelete ha li re letho ka tlhokahalo ea mesebetsi ho bacha kaha le chelete eo ho thoeng e abetsoe ho tla theha mesebetsi ea bacha e fokola haholo. O boletse tsena ka la 18 Hlakola monongoaha.

A re taba ea hore ho hlalositsoe hore baithuti ha ba qeta likolong ba tla ba hiroa ke bahoebi ba tla tšehetsoa ka 50% ena le taba e sa utloahaleng, kaha ho sena tsela e hlakileng ea hore na seo se tla etsoa joang. O re ho theoa ha lekhotla la bacha e lokela hoba taba eka sehloohong.

A re tlhokahalo ea mesebetsi ke ntlha e kholo ntlafalong ea naha le ho bacha ba naha ena. A re o loanne nako e telele hore marena a ekeletsoe, ho bile le tšepiso ea hore ba tla shejoe ba fumane meputso e phelisang.

O tsoetsepele hore o makalletse chelete e filong Lekala la Temo, e sa arabeleng selo sa lihoai tsa naha ena, sa seoa sa lefu le ntseng le bolaea liphoofolo. Ntle ho moo o re li mometse ka bothata ba tlhokahalo ea litokomane tsa mantlha tsa botho le libukana tsa ho eta.

E ntse e le khethollo hore marena le makanselara a



lokela ho fumana litsiane tse ba khothatsang hore ba etse mesebetsi ka nepo. A re bothata bo teng ke hore 'muso o fane ka litšepiso tse sakang tsa phethahala boleleng ba selemo.

Molula-Setulo oa Komiti e Alositseng Tšebeliso ea Lichelete (PAC) 'Machabana Lemphane Letsie, o hlalositse hore hona le M3Billione e abetsoeng litaba tsa bacha le M100Millione hore ho thusoe lifeme, a re taba ena e mo tšoentse hobane Lesotho lifeme ke tsa melata Basotho ba rothetse, a re o ngongorehisoa ke hore ba bang ba lifeme tseo ke litho tsa komiti e kholo ea RFP, bao ba bang esaleng ba sa lefe chelete tseo ba thusitsong ka tsona.

Are joale chelete ena ha e fuoe banka e ikemetseng ho tla ba thata ho e bitsetsa lipotsong ha hole bonolo ho bitsa LNDC, a re taba ena e sebe ke maholi a patile maeba.

'Muso o boetse o themelekane ha o lokela ho hlakisa ka botlalo na chelete e M10Millione e tl'o abeloa mabatooa bakeng sa mesebetsi ea li fato-fato e tl'o abeloa a feng. Likhakanyong tsa lichelete ho khutsitse tuu ka taba ena 'me le eona e siea letsoao la hore na 'nete e teng litabeng tse na kaha ho sa supjoe ka kotloloho se lokelang ho etsahala le moo chelete e lokelang ho ea teng.

Mokhethoa oa Ha Matala Dr. Tšeliso Moroke o re taba tsa khakanyo ea lichelete ke mokhabo-puo kaha ba loke- la ho bona bophethahatsi,

o re o bone khakanyo ea lichelete e fetileng o bona ena, a re o shebile hore na ba sebetsa litaba tsa sechaba joang.

Mokhethoa oa Mekaling Thabiso Lekitla o re likhakanyo tsena tsa lichelete ha li bonahale li entsoe ke batho ba neng ba tebisitse maikutlo ha ba ea ba lebane le litlhoko tsa sechaba. O re ha ho tsebahale na marena a tl'o nyoelleloa ka bokae kaha eka motho ea neng a



reka sefahleho sa marena.

O re tlala e patetse kahar'a naha, maqheku le maqhekoana ke bona bahlokomeli ba likhutsana ebile ba holisa litloholo, ha ba fuoa chelete e nyane ha ho arabele tlhoko. A re likhakanyong tsa lichelete tsa 2023- 2024 bacha ba ne ba abetsoe M4Millione bakeng sa ho theha mesebetsi, selemong sena, ba abetsoe M124Millione ke pontšo ea hore 'muso ha oa ikemiset- sa ho theha mesebetsi.



ba-Bosiu ho tloha la 19 ho isa la 23 Pherekhong 2026. Thupelo ena e ne e reretsoe ho matlafatsa leano, moralo, boikarabello le taolo maemong a setereke, ho itokisetša Likhetho tse Akaretsang tsa 2028, le ho rarolla likheo tse ileng tsa bonoa leanong la IEC la 2024–2028, ho kenyeletsa bofokoli pusong, bokhoni bo fokolang ba ho lekola le ho hlahloba, hammoho le mesebetsi e sa hlakang hantle.

Dr. Olweya o ile a boela a tsebisa Komisi hore UNDP hajoale e tšehetsa mananeo a ho aha bokhoni le thuto ea Marang-rang a reretsoeng balisa, a etsoang ka mor'a lihora tsa mosebetsi ho lumellana le mesebetsi ea bona ea letsatsi le letsatsi. IEC e ile ea khothalletsoa ho nka monyetla ona ho ngolisa baahi ba loketseng le ho fana ka thuto ho bakhethi.

Motsamaisi oa More-ro oa UNDP oa Inclusive Lesotho Elections, Mapholokoe Nkope, le eena o netefalitse hore International IDEA e ntse e tsoela pele ho tšehetsa IEC, ho kenyeletsa ho theha leano la thuto ea botho le ea bakhethi.

Ka tšehetso le tšebeliso ea EU-UNDP, UNDP e ntse e tsoela pele ho thusa IEC ka mehato ea bohlokoa, ho kenyeletsa liphetoho tsa molao tsamaisong ea ngoliso ea bakhethi, ho matlafatsa puisano ea leano ho loantša tlhahiso-leseling e fosahetseng, ho tsosolosa thuto ea botho le ea bakhethi naheng ka bophara, ho matlafatsa ba nkang karolo, le ho aha bokhoni ba mekhatlo le basebetsi.

Kopano e phethetsoe ka hore mahlakore ka bobeli a tiise tšebelisanong, ho kenyeletsa merero ea ho tšehetsa koetliso ea baqolotsi ba litaba ba Lesotho pele ho likhetho tse tlang. UNDP e bontšitse hore ho tla ba le litsebi tsa boralitaba tse tsoang Kenya tse tla sebetsa 'moho le MISA, ho koetlisa matlo a boralitaba le baqolotsi ka tšebeliso e nang le boikarabello ea Bohlale ba Maiketsetso (AI) litlalehong tsa likhetho.





TSA KEREKE

Ba keteka lilemo tse 200



Staff

Kopano ea Maoblata a Maria ea Senang Sekoli e ketikile sehopotso sa selemo le selemo sa ho ananeloa ha molao oa motheo oa kopano ea bona kahar'a Kereke ke Mopapa Leo XII, lilemong tse 200 tse fetileng. Ba boetse ba ketekile jubilee ea lilemo tse 200 tsa ho tsoaea ho ananeloa ha molao oa motheo tlas'a Mopapa Leo XIV. Tšebeletso ebile setsing sa Maoblata sa liphutheho Mazenod ka la 17 Hlakola monongoaha.

Tšebeletso ena e simolotse ka Sehlabelo se Halalelang sa 'Missa, se neng se eteletsoe pele ka Fr. Mothusi Boatile OMI le moteakone a le mong.

Khothatsong ea hae Fr. Laurence Mokhali Takatso OMI o itse ke tlotla ho bona hore ebe ke karolo ea ho tla keteka lilemo tsena tse 200 molao oa motheo oa kopano ea Maoblata a Maria ea Senang Sekoli o ananetsoe kahar'a kereke. A re moloa oo ba o filoeng ha se o ka ba imelang, o ka ba sitang haholo ha o le ho bona, A re ha o hole le bona, lentsoe le hau-fi le bona hobane o ka pelong tsa bona. "Ke hopala ha ke le Novitiate joale ke fuoa molao ho thoe nka 'me u tla phela." a rialo Fr. Takatso.

A re Morena Molimo h'a hole le bona, o haufi le bona hobane o ka pelong tsa bona. Ke ka hoo a ileng a bitsa Maoblata a Maria ea Senang Sekoli 'me joale ba utloa lentsoe la hae, 'me lentsoe la ba rome-la lefatšeng ho tla jala peo ea evangeli, haholo ho mafutsana.


A re kajeno ba keteka le ona mafutsana. A re ba lula ba itšetlehile ka Maria ea Senang Sekoli ha ba fetisa molaetsa ona, hobane ke hona moo ba okhang matla hona teng, hoba e le mohlala o motle oa ho utloa, oa boikokobetso le boinahano thatong ea Morena Molimo, 'me Maoblata a ithutile ho eena hore ho etsahale ho bona ka ho ea ka thato ea Molimo.

Fr. Takatso a re bophelo ba bona ha se ho hasanya molaetsa o molemo felaa, empa liketso tsa bona li tlameha ho paka seo ba se rutang, ba mamelle mathata le ho ba bahlanka ba Khotso. A re ba phelisane ka lerato, ba be moea o mong, ba be le bonngoe e le hore ba tle ba hlale liqholotso leetong lena

la bona. A re tsena tsohle li hloka ba be le mosa, boikokobetso, boithompho le mamellano.

A phethethela ka hore ketekelo ena e supa likatleho tse ngata, tse kholo. A re De Mazenodo e bile Mohalaleli, Ntate Joseph Gerard ea ba ea Lehlohonolo ea ba Morena Papa John Paul II o hata mobu oa Naha ea Lesotho. Le hore kopano e fumaneha linaheng tse 60.

Fr. Mothusi Boatile OMI o ile a lebohela Fr. Koenane Molefi OMI haele mona a se a khethetsoe ho tla ba Ramaoblata e mocha. A leboha le bohle ba kentseng letsoho hore mokete ona o atlehe. Litho tsa kopano li ile tsa qetella ka ho nchafatsa boinelo ba bona.



2025-2026 SELEMO A

SONTAHA SA 1 SA KARISIMA



Gense 2:7-9;3:1-7

Pesalema 50

Ba-Roma 5:12-19

Matheus 4:1-11



Khothatso

Tloha satane!

Qalong ea Karisima, Kereke e beha kapele ho rona batho ba babeli: ADAMA, motho oa pele ea ileng a senya morero oa Molimo 'me a senyetsa batho bohle ba tšileng kamorao ho eena, ka ketso ea hae ea boikhantho le ka ho tloa mola oa Molimo. Oa babeli ke KRISTE, Mora oa Molimo ea inketseng botho, ea tšileng lefatšeng ho lokisa litaba tsa batho, ho tsoarella le ho lefella libe tsa bona le ho khutlisetsa ntho tsohle malulong.

Kereke e re bontša batho bana ba babeli ha ba lekoa ke Satane. Adama a hloloa ke moleko 'me a etsa sebe, athe Kriste a hlola Satane 'me a mo leleka. Paulosi ea halalelang o re hlalose hore sebe le le lefu li kene lefatšeng ka motho a le mong 'me li feletse ho batho bohle: empa ka mokhoa o tsoanang, ke ka motho a le mong batho bohle ba fumane pholoho, tsoarello le bophelo.

Nakong ena ea Karisima, e leng nako ea ho soabela libe tsa rona le ho li lefella ka boitimo ba rona, lithapelo tsa rona le liketso tsa rona tsa mohau, re tsoanetse ho tebisa maikutlo a rona, e le hore re utloisise lebaka la ho etsa mesebetsi ena ea pako, re e phethe ka botsepehi 'me re amohela litholoana tsa eona.

Ha re utloa litaba tsa Adama le Eva serapeng sa Edene ha ba lekoa ke noha, rea soaba, 'me re re: ka 'nete ka batsoali ba rona ba pele ba fositse 'me phoso ea bona e kholo, hobane ke eona e sentse tsohle-tsohle lefatšeng: batho ba shoa, ba utloa bohlokoa, ba sebetsa ka thata; ke lintoa, mefere-fere, mashano, lipolao le litsietsi tse sa feleng. Tsena tsohle ke litholoana tsa leshano, ke litholoana tsa boikhantho.

Empa ha re talima seo re se etsang, re tsoanetse ho soaba le ho feta, hobane rona re tseba molemo oa Molimo, re tseba seo a re etselitseng sona, re na le tsebo e fetang ea Adama. Re tseba hore Molimo o re pholositse, 'me o re tsoaretse. Morena Molimo o buselitse litaba tse rona malulong ka Morena oa rona Jesu Kriste, Mora oa hae. Ka eena o re entsa bana ba hae le majalela a leholimo. O re file leseli le matla. Leha ho le joalo, re ntse re tsoela pele ho mo sitloa le ho mo soabisa, ka ho ikhantsetsa eena le ka ho hana ho mamela melao ea hae. Ruri phoso ea rona e kholo.

Hore Morena Molimo a ka rata ho kenya leholimong la hae batho ba lokileng ba sa kang ba mo soabisa le hanngoe feela, ke ntho eo re ka 'nang ra e utloisisa, leha e le ketso ea lerato le lehlo; empa ntho eo re sitoang ho e utloisisa ho nang, ke hore lerato lona lena la hae le se nang moeli le etse hore, esita le rona batsalibe, re lumelloe, re memeloe, 'me re khahametsoe ho kena leholimong.

Ke ofe moetsalibe ea ka bang le tšepo ea ho tsoarelloa joalo? Empa ho joalo! Kriste o ile a itjari-sa libe tsohle tsa batho 'me o li lefeletse ka ho lumela ho thakhisoa sefapanong le hore shoela, 'me ka hona o re file le tokelo ea ho kena leholimong. Ka ho ba motho, o re phahamiselitse boemong ba ho ba bana ba Molimo, 'me ka lefu la hae o re kopetse tsoarello ho Nt'a'e, 'me ka ho etsa joalo, a tlosa thibelo e neng e re sitisa ho fumana moputso oa bana, moputso o sa feleng oa leholimo.

Empa, esita le Morena Molimo ka sebele a ke ke a tlosa libe tsa rona, re sa rate. Lefu la Kriste le ke ke le e-ba le thuso ho rona, re sa sebelisane le eena. Ke eona thuto ea Karisima. Ke lona lebaka la Karisima. Karisima ke nako ea pako le tefelo. Re soabela liphoso tsohle tsa rona tseo re li entseng ho fihlela joale 'me re leka ho etsa liketso tsa boitelo, tsa mohau le tsa borapeli ho paka soabo ena ea rona.

Re rata ho ea leholimong qetellong ea bophelo ba rona lefatšeng. Morena Molimo o rata hore re ee hona teng hobane re bana ba hae. Empa Satane eena ha a rate, hobane o ne a ikhantsetse Morena Molimo tšimolohong 'me o fetohele sera sa hae. O n'a thetse batsoali ba rona ba pele. Na ebe le rona o tla re thetse?

Evangeli ea kajeno e re khothaletsa ho inehela mesebetsing ea Karisima ka mafolo-folo. Mohlala oa Kriste ea ileng a itima lijo matsatsi a mashome a mane, a se na sebe ho hang, o lokela ho thusa ho etsa litfelo, rona baetsalibe. Re tsoanetse ho itima lijo le ntho tse ling, ho itele e le ka 'nete ka tsatsi le leng le leng la Karisima.

Meleko eo Satane a neng a leka Jesu ka eona, ea hore a utloa menate ea lefatše, a rorisoe ka batho 'me a ba buse kamoo a ratang kateng, e ne e reretsoe ho mo lebatsa mosebetsi oa hae oa topollo ea batho.

Meleko ea rona e'a tsoana. Satane o rata ho re lebatsa bophelo bo sa feleng 'me o re bontša boiketlo boo re ka bo fumanang mona lefatšeng, boithabiso, chelete, matla le tse ling tse joalo, 'me hangata oa atleha. Batho ba likete-kete ba oela marabeng a hae. Empa lithetso tsa hae ke masaoana feela. Maruo a lefatše a tla fela mohlala lefu la rona 'me a tla re siea re se na letho, re lahletsoe lefifi le kantle, re sa bone tsela ea leholimo.

A re hlalobeng lipelo tsa rona 'me re bone na re etsa joang ha re lekoa ke Satane. Na re etsise Kriste ea reng "tloha ho 'na Satane"? Sepheo sa rona ha se ho ipokella ka menate ea lefatše le maru a lona, empa ke ho itokisetse bophelo bo lehlohonolo bo sa feleng, boo Kriste a re lokiselit-seng bona.

A re lakaletsaneng ho hahlela hammo nako ena ea ka lithapelo le ka pallo tse tiileng tsa ho furalla bophelo ba rona ba khale, le ho khutlela tseleng e nepahetseng, re setse Morena oa rona Jesu Kriste morao.

Bahalaleli har'a Beke

23	Hlakola	Polycarp
24	Hlakola	Betto
25	Hlakola	Donatus
26	Hlakola	Papias
27	Hlakola	Honorina
28	Hlakola	Oswald

Ba e lata letailane

eona e bapaloa ke libapali tse peli sehlopha ka seng,

'me lihlopha tsa pele tse peli li bopiloe ka libapali tse

ncha e leng, Neo Chapole le Moroosi Tolofi sa bobeli ka

Tšeliso Thakholi

Mokhethoa oa libapali tse tšelelseng tsa papali ea Beach Volleyball o boikoetlisong bo matla mabaleng a Sekolo se Sehlo sa Temo, Maseru, bo etellang pele litholisano tsa bona tsa Mokhahlelo oa pele oa Beach Volleyball Zone VI BVB Tours, tse tšil'o thakhoha Motse-Moholo Windhoek, Namibia mafelong ana a beke ka la 20 ho isa la 22 Hlakola monongoaha. Ho ea ka mookameli oa Sehlopha sa Naha sa Beach Volleyball, Mofumahali 'Maletseketoa Sekhonyana, o re mokhethoa o bopiloe ka libapali tse tšeletseng tse arotsoeng ka lihlopha tse tharo kaha papali ka bo



Relebohile Ndaga le Palesa Mapota. Haele sehlopha sa khale sona se ahiloe ka lika-kapa tse kang Moleboheng Mofolo le Itumeleng Mareka. A re sehlopha sena se tlas'a bokoetlisi bo chatsi ba Monghali Thabiso Maboe.

"Libapali tsena tse tšeletseng tsa Naha ea Lesotho, li il'o qothisana le-hlokoa le libapali tsa linaha tsa SADC tseo rona re li bitsang tsa Zone VI, e leng Botswana, Lesotho, Eswatini, Zambia, Zimbabwe, Angola, Malawi, Mozambique, Afrika Boroa, Mauritius, Seychelles, DRC, United Republic of Tanzania le Namibia, e leng eona e amohelang baeti." Ke Sekhonyana eo.

A re ho tloha ha ba qala ho itokisetša lipapali tsena ha be e-s'o be le lipapali tsa setsoalle haholo lihlopha tsena tse ncha, "empa libapali tsa sehlopha seo e seng e le sa khale ha hona letho le lecha ho bona, kaha li se li ntse li tseba mahlale le maqiti a papali ena ea Beach Volleyball, ba bile ba bonahala ba ipabola haholo lipapaling tseo ba seng ba li bapetse."

"Lena e tla be le lekhetlo la pele sehlopha sa naha se bapala lipapali tsa boemo ba National Beach Volleyball, kaha boholo ba nako li bapaloa ke sehlopha sa Volleyball e mona e tloaelehleng, e bapaloang katlung e bapalang ke libapali tse tšeletseng sehlopha ka seng." O bole-tse joalo a bile a eketsa ka hore o na le tšepo e kholo ea hore libapali tsena tsa Lesotho li tla sebetsa hantle litholisano tse ncha. A tiisa hore tšepo ea hae e kholo ke hobane libapali tsena li khethiloe kahar'a lihlopha tsa Beach Volleyball ho ea emela naha, ho ipapisitsoe le makhabane a tsona.

A re papali ea Beach Volley Ball ha se hakaalo hore ke papali e bapaloang le-atleng joalokaha batho ba bang ba nahana, empa e bapalloa lehlatheng. Ka hona Naha ea Lesotho ha se mokhelo hobane le eona ena le lehlatheng le le ngata. "Linaha tsa SADC ke tse fokolang haholo tse nang le maoatle, empa le tsona tse senang ona ke karolo lipapaling tsena. Re rafa lehlatheng linokeng re etsa mabala a Beach Volleyball joalokaha u'a bona e le ana Sekolong sena sa Temo." A rialo

A qetella ka hore mekhoha ea ho bapala papali ena e ntse e tšoana empa ho fapana melao mona le mane, kaha papali ea Beach Volleyball eona e fela ka lipapali tse 21 ha e mona e tloaelehleng eona e fela ka 25.

Badminton ha e'a sebetsa hantle

Tšeliso Thakholi

Libapali tsa Lesotho tsa bahlankana le baroetsana tsa papali ea Lesiba e tsebahalang haholo ka hore ke Badminton tseo e neng e le karolo ea litholisano tsa machaba tsa All Africa Men's and Women's Team Championships tse neng li tšoaretsoe Gabone, Naheng ea Botswana, ka la 9 ho isa la 15 Hlakola monongoaha, boholo ba tsona li khutla tšiba ho lla tse ka mahafing, haese tse seng kae tse hlaheletseng mona le mane sethathong sa lipapali tsena.

Libapali tsena tse neng li etelletsoe pele ke mokoetlisi ea hloahloa Nyakallo Seboka ho hlaha Mokhatlong oa Lesotho oa Papali ea Badminton (LESBAD), li ne li bopiloe ka bahlankana ba tšeletseng e leng; Mokhali Maleke, Neo Rahlolo, Katleho Mohapi, Limpho Matlosa, Neo Tšokelo le Rethabile Sehlole. Athe baroetsana ba bile ba bane, bona ke; Lerato Matlosa, Thato Talejane, Kelumetse Moletsisi le Khahliso Khetheng. Kaofela libapali tsena li bapetse maemong ohle, eleng moo sebapali se bapalang ka bonngoe, ka bobeli le moo ba kopaneng e se e le sehlopha.

Naha ea Lesotho ka ho bahlankana e ne e bapala Mokhahlelong oa D moo e bapatseng le linaha tse



kang Mauritius, Afrika Boroa le Seychelles. Haele ka ho baroetsana e ne e le Mokhahlelong oa A moo e neng e pannoe le Algeria, Mauritius le Botswana.

Boholo ba libapali tsena ha li'a sebetsa hantle ho hang, 'me le libapali tse seng li ena le boiphihlelo papaling ea Lesiba maemong a machaba tse kang Neo Rahlolo le Mokhali Maleke, tse neng li tšepetsoe hore li tla tlela Naha ea Lesotho

mentlele oa Khauta kapa oa Bronze, ba ne ba hlile ba hula ka lithako tsa morao. Haele ka ho baroetsana li hlile tsa hloa lekhoara li sa tloha ho fihlela motsotsong oa ho qetela. Pelaelo ke hore boholo ba bona ene e le libapali tse ncha haholo tse neng li qala ho kenela lipapali tsa machaba.

Puisanong le Raliphatalatso oa Mokatlo oa Lesotho oa Papali ea Badminton, Monghali Moorosi Tsiane o boletse hore leha ba sa sebetsa hantle lipapaling tsena, sehlopha sa habo se fihletse seo ba neng ba se hloka, eleng hore libapali li ke li il'o nka malebela a papali boemong ba machaba.

A tiisa hore tebello e ne e se hore ba ka hlola linaha tseo ba neng ba qothisana le-hlokoa le tsona ho late-la boiphihlelo boo li seng li ena le bona lipapaling tsa Badminton, empa taba ea bohlokoa e ne e le ho ea fumana thuto ka papali ena, le ho leka ho lokisa libapali

tse bona hore li tloaele maemo a lipapali tsa machaba, kaha e ne e le khetlo la pele ba bapala lipapali tsa machaba boemong ba tikoloho ea Afrika.

A qetella ka hore bona e le botsamaisi ba etse hloko hore Naha ea Lesotho e hloka bo bapala lipapali tse ngata haholo tsa machaba, e le ho etsa hore ba tloaele maemo ana. Leha ho le joalo, o itse ka nako e 'ngoe boemo bona bo sitisoa ke mathata a ho hloka lithuso tsa lichelete kahar'a naha.

Mohloli lipapaling tsena ka ho basali e bile Shami-ka Rafi oa Naha ea Uganda, ka hoba eena mosali oa pele oa ho etsa nalane, ka ho hapa Khau ea Khauta lipapali tsena tsa All African Senior Championship, kamor'a ho hlola mohloli oa nako e telele e leng Johanita Scholtz oa Afrika Boroa. Ha ka ho banna Kalombo Mulenga oa Zambia a ile a makatsa ba ngata ka ho ikhapela tlhlo.



Mehalalitoe lipapaling tsa COSAFA

Tšeliso Thakholi

Tšepo ea barati le batšehetsi ba Sehlopha sa Naha sa bolo ea maoto sa basali sa Mehalalitoe ea hore se tla o bese o tuke litlholisano tsa mokhahlelo oa pele oa Mohope oa COSAFA tse tlang ho tšoareloa Polokwane, Afrika Boroa ho tloha ka la 18 Hlakola ho isa la 1 Tlhakubele monongoa, e fokola haholo ho latela linaha tse boima tsa Mokhahlelo oa A oo sehlopha se pannoeng le tsona.

Sehlopha sena se tlas'a bokoetlisi bo hloahloa ba Monghali Shalane Lehohla se tlohile Motse-Moholo Maseru matsatsi a mabeli pele ho papali ea sona ea pele khahlanong le Angola e bulang litholisano tsa COSAFA ka la 18 Hlakola monongoa. Potso e kholo eo barati ba bolo ba ipotsang eona ke hore na se tla hle se o bese o tuke!

Puisanong e khutšoanya-ne le motlalehi oa Koranta ena, balateli ba bontšiste hore sehlopha sa naha sa Mehalalitoe ha se ea ka sa

eba le lipapali tsa setsoalle tsa machaba pele se bapala lipapali tsena. Ho feta mona se bile le boikoetliso bo fokolang haholo empa lipapali ka bo tsona e le tse matla. Ba re Mehalalitoe ho latela tsela eo se seng se ile sa bapala ka teng lipapali tsa ho feta tsa COSAFA, ho bonahala ho ntse ho se phetoho ho hang, 'me se ntse se tetebela bolibeng ba mahlomola.

Ba re Mokoetlisi Shalane Lehohla o tobane le liphep-

hetso tse ngata tsa ho fetola boemo ba papali ea Mehalalitoe, bo e fetotseng nteteng lipapaling tsa machaba, ho se isa boemong boo e tla jesetsa linaha tse ling tsa Afrika khoebeleng. Balateli ba bontšitse ba sa khotsofala ke tsela eo ho khethoang libapali tse emelang naha sehlopheng se seholo sa Mehalalitoe. Ba khotsofatsa mokoetlisi le bathusi ba hae ho isa leihlo lihlopheng tsohle tsa naha ha ba bopa mokhethoa oa

naha.

"Ha ho oa lekana hore ebe sehlopha sa naha se ka boptjoa ka lihlopha tse tharo feela e leng Kick4Life Ladies, LDF Ladies le Berea Ladies," ba rialo ba bile ba eketsa ka hore bothata bo boholo boo ba bo bonang ke maemo a hloabaetsang a Women's Super League e ntseng e qelisa ho LeFA ha e lokela hore e fumantšoe litšehetso, 'me e tsebe ho ikemela joaloka tsa ling.

Ba re tlas'a maemo ana

Lesotho le ke ke la eba le sehlopha se matla sa naha sa bolo ea basali. Ba re bolo ea basali e tlokotsing e kholo ka ho hloka mabala le tsamaiso e nang le ponaleto. Ba re linaheng tse ngata ntle le Lesotho mona papali ea bolo ea maoto ea basali e phahame haholo hoo e seng ena le mabala a matle e bile e fetohile khoebo. Ba phethela ka ho ipiletsa ho 'muso le LeFA ho ema ka maoto ho tšehetsa bolo ea maoto ea basali ka kha-ho ea mabala le ka lithuso tsa lichelete ho bona hore e'a hola, molemong oa ho ntlatfatsa le ho holisa talenta ea bana ba Basotho.

Ho sa le joalo, ka la 18 Hlakola Mehalalitoe e tla botsana lipotso le Angola, ebe ka lona letsatsi le tšoanang Banyana-Banyana ea Afrika Boroa e bapala le Malawi e le papali ea bobeli. Athe ka la 24 Hlakola Mahalalitoe e tla boela e bapala papali ea eona e hlahlamang le sehlopha sa Banyana-Banyana. Ebe papali e latelang eo eba lipakeng tsa Angola le Malawi.



Kick4Life e makatsa Liponono

Tšeliso Thakholi

Sehlopha sa Bolo ea Maoto sa Liki e ka Boroa sa A Division se phamisitse menyetla ea sona ea hoba kahar'a lihlopha tse ka holimo lokong, ha se ne se etsoa ka lesoba la nale ka ho shapa sa Liponono ka thupa e bohloko ea 1-0, papaling e bapalletsoeng Lebaleng sa Sekolo se Seholo sa Temo, Maseru ka la 15 Hlakola 2026.

Molefi Kulehile o hlabile ntlha ea Kick4Life metsotso e se mekae karolong ea pele ea papali. Liponono e ile ea leka ho lekanya lintlha kamor'a metsotso e 25 ka Mopeli Koloti empa ea hloleha. Kamorao ho moo Liponono e bapetse karolo ea eona ea pele e le tlas'a khatello e matla ea ho leka ho lekanya lintlha, 'me sena se ile sa etsa hore boholo ba libapali tsa eona bo iphumane bo ena le likarete tse ngata tse tšehla kaha e ne e se e bapala ka sekhahla. Le ha ho le joalo, Kick4Life ha e'a bonahala e nka menyetla e mengata haholo ea ho eketsa lintlha, empa e ile ea etsa liphetho tse ngata haholo karolong ea bobeli ea papali ho matlafatsa mola o kamorao oa papali le bohareng moo e neng e hlile e

bonahala e khoehla.

Puisanong le Mokoetlisi oa Sehlopha sa Liponono, Monghali Mokhothu Khoatsana kamor'a papali, o boletse hore o khotsofetse haholo ke tsela eo sehlopha sa habo se bapetseng kateng kaha se ne pile moralo oo se neng se ralile ho tla bapala ka ona oa ho tla thiba Kick4Life ho bapala libolo tse telele le ho tla ho bona ka sekhahla se seholo.

A re o ile a bona ha ba bapala le sona mokhahlelong oa pele oa lipapali tse fetileng hore ke sehlopha se potlakang haholo ka libolo le ho bapala libolo tse telele tse ka bang kotsi ho sehlopha, e leng taba eo a ileng a sebetsana le eona nakong ea ho itokisetsa papali ena. Leha ho le joalo, a re o bone

ba ntse ba ba fa bothata mona le mane empa ba ne ba se ba ketsoe mecha ea bona e kotsi ea ho phunya sehlopha bohareng ba lebala.

A eketsa ka hore leha ba lahlehetsoe ke papali ena o motlotlo kamoo libapali li bapetseng hantle kateng, 'me ka kotloloho o thoholelitse libapali tse ncha tseo ba neng ba sa tsoa li ngolisa kahare ho sehlopha, ka hore ba bonahala ba tlisitse botsitso kahare ho sehlopha likarolong tsa lebala tseo ba neng ba bapala ho tsona. A re o bona phetoho e kholo papisong le karolong e fetileng ea papali moo sehlopha se neng se hlajoa lintlha ha bobebe, 'me le tseo se lihlabileng balireng se sitoa ho li tšireletsa.

A bontša hore hajoale seo



MASERU MASTERS LEAGUE 2026 15 Hlakola 2026 Li bapetse tjena:

Fafatsah	0-2	Boqate Masters
Gladiators	3-2	Millenium
Scorpion	1-3	Seapoint Black XI
Abia Masters	2-2	L. Legends
Castle XI	2-1	FateSeaBua Masters
A. Masters	4-3	Semetletsa
9Nine	5-1	Machache Masters

LI TLA BAPALA TJENA:
Sondaha: 22 Hlakola 2026
Millennium vs D. Athletic
Sekoele vs Boqate
S. Black XI vs Gladiators
L. Legends vs Scorpion
FateSeaBua vs Abia Masters
Machache vs Africa Masters
Ramblers vs 9Nine
Standby: Fafatsah

ba seng ba lokela ho shebane le sona e le bakoetlisi ba sehlopha ke ho lokisa mokhoa oa ho hlabisa lintlha. A ba sechele haholo hore na ebe ba ka lakatsa ho bona sehlopha se le mae-mong a fe ha lipapali tsa liki li fela, empa a re seo se tla tlisoa feela ke ha sehlopha se sebetsa hantle ka ho hapa lipapali tsa tsona.

"Re na le tšabo ea hore re ka fumana re behile libapali tsa rona tla sa khatello ea ho sebeletsa hoba boemong bo itseng, haholo-holo ha baka hlokomela lihlopha tse ling tse ka pele ho rona li se li le holimo ka lintlha. Ka hona sena se ka tloha sa ba liea moea ra qe-

tella re fumane litholoana tse bosula." Ke eena eo.

Ho sa le joalo, lipapali tse ling tse ileng tsa bapala tsa A Division ke moo FC Summit e makalitseng barati le batšehetsi ba bolo ha e teteke sehlopha se lihulang pele Lokong e ka Boroa ea A Division ka phafa ea 4-0. Haele ka Leboea teng Happy Hearts le Litšehlo tsa pitikisa mahae ka 0-0, Butha Buthe Warriors ea hlola Lilemela ka 1-0 ha sehlopha se ntseng se loanela ho khutlela lihlopheng tse kholo lekhetlo la bobeli ka tatellano sa Mzamane se ile sa chophola ka matsohong a Sehenehene ka ho se hlo-la 1-0.